

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

## সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৬০/২০১৭

ঢাকা, রোববার ২৭ মার্চ ২০১৭, ১৩ চৈত্র ১৪২৩

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। যথাযোগ্য মর্যাদায় স্বাধীনতা ও জাতীয় দিবস উদযাপন : জঙ্গিবাদমুক্ত দেশ গড়ার প্রত্যয়
- ২। মহান স্বাধীনতা দিবস উপলক্ষে জাতীয় স্মৃতিসৌধে রাষ্ট্রপতি ও প্রধানমন্ত্রীর শ্রদ্ধা
- ৩। বিপথগামীরা সৎপথে ফিরলে তাদের সব ধরনের সহযোগিতা ও পুনর্বাসন করা হবে : প্রধানমন্ত্রী
- ৪। মহান স্বাধীনতা ও জাতীয় দিবস উপলক্ষে বঙ্গভবনে রাষ্ট্রপতির সংবর্ধনা
- ৫। মহান স্বাধীনতা ও জাতীয় দিবস উপলক্ষে ভারতের রাষ্ট্রপতি ও প্রধানমন্ত্রীর শুভেচ্ছা
- ৬। অপারেশন টোয়াইলাইটে দুই জঙ্গি নিহত, অভিযান অব্যাহত
- ৭। দেশের কোথাও আইএস নেই : স্বরাষ্ট্রমন্ত্রী
- ৮। মুক্তিযোদ্ধাদের পানি ও বিদ্যুৎ বিল মওকুফে উদ্যোগ নেওয়া হবে : স্থানীয় সরকার মন্ত্রী
- ৯। অর্থনৈতিক মুক্তি বিজয়ের দ্বারপ্রান্তে বাংলাদেশ : পরিকল্পনামন্ত্রী
- ১০। জঙ্গিবাদে অর্থাৎ হুন্ডি ও ব্যাংকিং চ্যানেলে : দুদক চেয়ারম্যান

১। যথাযোগ্য মর্যাদায় স্বাধীনতা ও জাতীয় দিবস উদযাপন : জঙ্গিবাদমুক্ত দেশ গড়ার প্রত্যয়

মুক্তিযুদ্ধে বীর শহিদদের স্মৃতির প্রতি গভীর শ্রদ্ধা নিবেদনের মাধ্যমে যথাযোগ্য মর্যাদায় গতকাল ২৬ মার্চ রোববার মহান স্বাধীনতা ও জাতীয় দিবস উদযাপন করেছে বাঙালি জাতি। একই সঙ্গে তারা শপথ নিয়েছে সন্ত্রাস ও জঙ্গিবাদমুক্ত বাংলাদেশ গড়ার। কর্মসূচির মধ্যে ছিল শহিদ মুক্তিযোদ্ধা স্মৃতিফলকে পুষ্পস্তবক অর্পণ, মুক্তিযোদ্ধা ও শহিদ পরিবারের সদস্যদের সংবর্ধনা, দেশের কল্যাণ ও সমৃদ্ধি কামনা করে মসজিদ, মন্দির, গির্জা ও প্যাগোডায় প্রার্থনা, শিক্ষা প্রতিষ্ঠানে শিক্ষার্থীদের ডিসপ্লে প্রদর্শন, আলোচনা সভা, সাংস্কৃতিক অনুষ্ঠান ইত্যাদি। সূত্র-ভোরের কাগজ (শেষ পৃ. ক. ৫), সমকাল (পৃ. ১, ক. ৭), ডেইলি সান (পৃ. ১, ক. ৫), অবজারভার (পৃ. ১, ক. ২)।

২। মহান স্বাধীনতা দিবস উপলক্ষে জাতীয় স্মৃতিসৌধে রাষ্ট্রপতি ও প্রধানমন্ত্রীর শ্রদ্ধা

রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা ৪৭তম স্বাধীনতা দিবস ও জাতীয় দিবস উপলক্ষে সাভারে জাতীয় স্মৃতিসৌধে পুষ্পস্তবক অর্পণের মাধ্যমে মহান মুক্তিযুদ্ধের বীর শহিদদের প্রতি শ্রদ্ধা নিবেদন করেছেন। গতকাল ২৬ মার্চ রোববার রাষ্ট্রপতি মো. আবদুল হামিদ প্রথমে স্মৃতিসৌধের বেদিতে পুষ্পস্তবক অর্পণ করেন। এরপর প্রধানমন্ত্রী শেখ হাসিনা পুষ্পার্ঘ্য অর্পণ করেন। পুষ্পস্তবক অর্পণের পর রাষ্ট্রপতি ও প্রধানমন্ত্রী একাত্তরের মহান মুক্তিযুদ্ধের বীর শহিদদের স্মরণে কিছুক্ষণ নিরবে দাঁড়িয়ে থাকেন। বাংলাদেশ সেনাবাহিনী, নৌবাহিনী ও বিমানবাহিনীর একটি সুসজ্জিত দল এ সময় রাষ্ট্রীয় সালাম জানায়। এ সময় বিউগলে করুণ সুর বাজানো হয়। সূত্র-সংবাদ (শেষ পৃ. ক. ১)। সমকাল, ইত্তেফাক, জনকণ্ঠ, ইন্ডিপেনডেন্ট, অবজারভারসহ অধিকাংশ পত্রিকা এ বিষয়ে ছবিসহ খবর ছেপেছে।

৩। বিপথগামীরা সৎপথে ফিরলে তাদের সব ধরনের সহযোগিতা ও পুনর্বাসন করা হবে : প্রধানমন্ত্রী

প্রধানমন্ত্রী শেখ হাসিনা বলেছেন, বিপথগামীরা সন্ত্রাস ও জঙ্গিবাদ ছেড়ে সৎপথে ফিরে এলে তাদের সব ধরনের সহযোগিতা ও পুনর্বাসন করা হবে। তিনি বলেন, যারা বিপথে যাচ্ছে, তারা যেন বিপথ ছেড়ে সৎপথে ফিরে আসে। তাদের জীবন-জীবিকার জন্য যা যা প্রয়োজন, সরকার তার সবই করবে। কিন্তু কেউ যেন এভাবে আত্মহনন আর জঙ্গিবাদ-সন্ত্রাসের পথ বেছে না নেয়। পাশাপাশি সন্ত্রাস-মাদক ও জঙ্গিবাদের বিরুদ্ধে কঠোর হুঁশিয়ারি উচ্চারণ এবং এ ক্ষেত্রে তার সরকারের দৃঢ় অবস্থানের কথা পুনর্ব্যক্ত করে প্রধানমন্ত্রী বলেন, জঙ্গিবাদ ও সন্ত্রাসের বিরুদ্ধে আইন-শৃঙ্খলা রক্ষাকারী বাহিনীর অভিযান অব্যাহত থাকবে। কঠোর হাতে তা দমন করা হবে। গতকাল ২৬ মার্চ রোববার বঙ্গবন্ধু জাতীয় স্টেডিয়ামে মহান স্বাধীনতা ও জাতীয় দিবসে শিশু-কিশোর সমাবেশ ও কুচকাওয়াজে প্রধান অতিথির বক্তৃতায় প্রধানমন্ত্রী এসব কথা বলেন। সূত্র-সমকাল (শেষ পৃ. ক. ২), ইত্তেফাক (পৃ. ১, ক. ৬), ডেইলি সান (পৃ. ১, ক. ৮)।

৪। মহান স্বাধীনতা ও জাতীয় দিবস উপলক্ষে বঙ্গভবনে রাষ্ট্রপতির সংবর্ধনা

রাষ্ট্রপতি মো. আবদুল হামিদ দেশের ৪৭তম স্বাধীনতা ও জাতীয় দিবসে বঙ্গভবনে এক সংবর্ধনার আয়োজন করেন। গতকাল ২৬ মার্চ রোববার বঙ্গভবন প্রাঙ্গণে বিকেলে অনুষ্ঠিত এ সংবর্ধনায় প্রধানমন্ত্রী শেখ হাসিনা যোগ দেন। স্পিকার ড. শিরীন শারমিন চৌধুরী ও সাবেক রাষ্ট্রপতি অধ্যাপক ড. এ কিউ এম বদরুদ্দোজা চৌধুরীও সংবর্ধনায় অংশ নেন। বিভিন্ন দলের রাজনীতিক, কূটনীতিক, যুদ্ধাহত মুক্তিযোদ্ধা, বীরশ্রেষ্ঠদের পরিবার এবং শিল্পী ও সাংস্কৃতিক ব্যক্তিত্বসহ বিভিন্ন শ্রেণি পেশার মানুষ উপস্থিত ছিলেন বঙ্গভবনের সবুজ প্রাঙ্গণে। লাল-সবুজ পাতা দিয়ে তৈরি একটি পতাকা অনুষ্ঠানে আনে ভিন্নমাত্রা। সূত্র-ইত্তেফাক (শেষ পৃ. ক. ৫), সমকাল (পৃ. ২, ক. ৫), ইন্ডিপেনডেন্ট (পৃ. ১৫, ক. ৬), ডেইলি সান (পৃ. ২, ক. ১)।

৫। অপারেশন টোয়াইলাইটে দুই জঙ্গি নিহত, অভিযান অব্যাহত

সিলেটে জঙ্গি আস্তানা আতিয়া মহলে 'অপারেশন টোয়াইলাইটে' এখন পর্যন্ত দুই জঙ্গি নিহত হয়েছে। সেনাবাহিনীর প্যারাকম্যান্ডোদের গুলিতে এক এবং আত্মঘাতী বোমার বিস্ফোরণে অপর জঙ্গি নিহত হয়েছে। এখনও আতিয়া মহলের ভেতরে আরও কয়েক জঙ্গি রয়েছে বলে ধারণা করছে আইনশৃঙ্খলা রক্ষাকারী বাহিনী। গতকাল ২৬ মার্চ রোববার 'অপারেশন টোয়াইলাইট' সম্পর্কে সর্বশেষ খবর জানাতে আয়োজন করা সংবাদ সম্মেলনে এসব কথা জানানো

হয়েছে। এদিকে গ্রেনেড আর গুলির শব্দে আতঙ্কে দিন কাটছে আতিয়া মহলের চারপাশে এক বর্গকিলোমিটার এলাকার সাধারণ মানুষের। গতকাল ২৬ মার্চ রোববার শিববাড়ি এলাকা ছিল কার্যত অবরুদ্ধ। গত ২৫ মার্চ শনিবার রাতে শক্তিশালী বোমা বিস্ফোরণের পর জারি করা ১৪৪ ধারা ভেঙ্গে কেউ এই এলাকায় প্রবেশ করতে পারছেন না। আতিয়া মহলের চার পাশের বাড়িঘর ফেলে স্থানীয় বাসিন্দারা নিরাপদ স্থানে চলে গেছেন। সূত্র-জনকণ্ঠ (পৃ. ১, ক.

২), সমকাল (পৃ. ১, ক. ৬)। অবজারভার (পৃ. ১, ক. ৬)। প্রথম আলো, ইত্তেফাক, ইন্ডিপেনডেন্ট, ডেইলি সানসহ অধিকাংশ পত্রিকা এ বিষয়ে লিড নিউজ ছেপেছে।

#### ৬। দেশের কোথাও আইএস নেই : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, দেশের কোথাও ইসলামিক স্টেট বা আইএস নামের কোনো জঙ্গি সংগঠনের অস্তিত্ব নেই। সারাদেশে কোথাও আইএস নেই। দেশের বিভিন্ন প্রান্তে কোনো ব্যক্তিই আইএসের সন্ধান দিতে পারেননি। গতকাল ২৬ মার্চ রোববার রাজারবাগ পুলিশ লাইনসে শহিদ স্মৃতিসৌধে পুষ্পস্তবক অর্পণ শেষে এ কথা বলেন তিনি। স্বরাষ্ট্রমন্ত্রী বলেন, সিলেটের শিববাড়ি এলাকায় ‘আতিয়া মহলে’ জঙ্গি আস্তানায় অভিযান অব্যাহত রয়েছে। সেখানে বড় কোনো জঙ্গি নেতা থাকতে পারে। অভিযান শেষ হলে বিস্তারিত জানা যাবে। সূত্র-সমকাল (পৃ. ২, ক. ৫), ইত্তেফাক (পৃ. ১, ক. ৮) অবজারভার (পৃ. ১, ক. ৪)।

#### ৭। মুক্তিযোদ্ধাদের পানি ও বিদ্যুৎ বিল মওকুফে উদ্যোগ নেওয়া হবে : স্থানীয় সরকার মন্ত্রী

স্থানীয় সরকার, পল্লী উন্নয়ন ও সমবায়মন্ত্রী খন্দকার মোশাররফ হোসেন বলেছেন, মুক্তিযোদ্ধারা দেশের সেবা সন্তান। তাদের জন্য পৌরসভার পৌর কর, পানি ও বিদ্যুতের বিল মওকুফের উদ্যোগ নেওয়া হবে। স্থানীয় পর্যায়ে এ উদ্যোগ বাস্তবায়ন করা সম্ভব না হলে প্রয়োজনে স্থানীয় সরকার মন্ত্রণালয় থেকে এটি অনুমোদন করিয়ে নেওয়া হবে। গতকাল ২৬ মার্চ রোববার ফরিদপুরে ‘মুক্তিযোদ্ধা ও শহিদ মুক্তিযোদ্ধাদের পরিবারবর্গের সংবর্ধনা অনুষ্ঠানে’ প্রধান অতিথির বক্তব্যে এ উদ্যোগের কথা জানান মন্ত্রী। সূত্র-সমকাল (পৃ. ৪, ক. ৫) যুগান্তর (পৃ. ১৪, ক. ৪)।

#### ৮। অর্থনৈতিক মুক্তি বিজয়ের দ্বারপ্রান্তে বাংলাদেশ : পরিকল্পনামন্ত্রী

দারিদ্র্যের বৃত্ত ভেঙে বাংলাদেশের অর্থনৈতিক মুক্তি বিজয়ের দ্বারপ্রান্তে বলে জানিয়েছেন পরিকল্পনামন্ত্রী আ হ ম মুস্তফা কামাল। তিনি বলেন, ভৌগলিক স্বাধীনতার পাশাপাশি অর্থনৈতিক মুক্তি একটি জাতির জন্য অপরিহার্য। ২০২১ সালের বাংলাদেশ হবে মধ্যম আয়ের, ২০৩০ সালের বাংলাদেশ হবে দারিদ্র্যমুক্ত এবং জ্ঞানভিত্তিক অর্থনীতির বাংলাদেশ। এরই ধারাবাহিকতায় ২০৪০ সালের বাংলাদেশ বিশ্বের ২০তম উন্নত দেশের কাতারে শামিল হবে। গতকাল ২৬ মার্চ রোববার কুমিল্লা বিশ্ববিদ্যালয় ক্যাম্পাসে মহান স্বাধীনতা দিবস উপলক্ষে আয়োজিত ‘আমাদের স্বাধীনতা ও অর্থনৈতিক মুক্তি’ শীর্ষক আলোচনা সভায় প্রধান অতিথির বক্তব্যে তিনি এসব কথা বলেন। সূত্র-সংবাদ (পৃ. ৪, ক. ১) সমকাল (পৃ. ৭, ক. ১)।

#### ৯। জঙ্গিবাদে অর্থায়ন হচ্ছে হুন্ডি ও ব্যাংকিং চ্যানেলে : দুদক চেয়ারম্যান

ব্যাংকিং চ্যানেল ও হুন্ডির মাধ্যমেই জঙ্গিবাদের অর্থায়ন হচ্ছে। এই অর্থায়ন প্রক্রিয়া বন্ধে বাংলাদেশ ব্যাংক ও জাতীয় রাজস্ব বোর্ড (এনবিআর) কাজ করছে। এ ক্ষেত্রে দুর্নীতি দমন কমিশন (দুদক) শীঘ্রই ব্যাংকিং খাতে নজরদারিও জোরদার করবে। ‘দুর্নীতি প্রতিরোধ সপ্তাহ-২০১৭’-এর উদ্বোধন শেষে দুদক চেয়ারম্যান ইকবাল মাহমুদ এ কথা বলেন। গতকাল ২৬ মার্চ রোববার রাজধানীর সেগুনবাগিচায় দুদকের প্রধান কার্যালয়ের মূল ফটকের সামনে দুদক চেয়ারম্যান বেলুন ও পায়রা উড়িয়ে সপ্তাহব্যাপী এ কার্যক্রম উদ্বোধন করেন। এরপর তিনি দুদক প্রাক্তনের মিডিয়া সেন্টারে দুর্নীতিবিরোধী কার্টুন ও পোস্টার প্রদর্শনীর উদ্বোধন করেন। সূত্র-সমকাল (পৃ. ২, ক. ৮) জনকণ্ঠ (পৃ. ১, ক. ২), ডেইলি সান (পৃ. ২, ক. ২)।

#### ১০। মহান স্বাধীনতা ও জাতীয় দিবস উপলক্ষে ভারতের রাষ্ট্রপতি ও প্রধানমন্ত্রীর শুভেচ্ছা

মহান স্বাধীনতা ও জাতীয় দিবস উপলক্ষে বাংলাদেশের জনগণ ও সরকারকে শুভেচ্ছা জানিয়েছেন ভারতের রাষ্ট্রপতি প্রণব মুখার্জি ও প্রধানমন্ত্রী নরেন্দ্র মোদি। ভারত ও বাংলাদেশের ঘনিষ্ঠ সম্পর্কের কথা উল্লেখ করে পৃথক বার্তায়

তারা এ সম্পর্ক আরও জোরদার হবে বলে আশা প্রকাশ করেন। রাষ্ট্রপতি মো. আবদুল হামিদকে গত ২৫ মার্চ শনিবার পাঠানো শুভেচ্ছা বার্তায় প্রণব মুখার্জি বলেন, উভয় দেশের জনগণের আকাঙ্ক্ষা পূরণে ভারত ও বাংলাদেশ যৌথভাবে তাদের প্রচেষ্টা অব্যাহত রাখবে। গতকাল ২৬ মার্চ রোববার ইন্ডিয়ান এক্সপ্রেস এক খবরে জানায়, ভারতের প্রধানমন্ত্রী নরেন্দ্র মোদির মাসিক রেডিও অনুষ্ঠান 'মান কি বাত'-এ গতকাল ২৬ মার্চ রোববার তিনি বঙ্গব্যের গুরুত্বই বাংলাদেশকে অভিনন্দন ও শুভেচ্ছা জানান। সেই সঙ্গে একাত্তরে সাহসী নেতৃত্বের জন্য বঙ্গবন্ধু শেখ মুজিবুর রহমান, মুক্তিযোদ্ধা ও মুক্তিযুদ্ধে বীর শহিদদের প্রতি শ্রদ্ধা জানান। তিনি বলেন, ভারত সব সময়ই বন্ধুপ্রতিম বাংলাদেশের পাশে থাকবে। সূত্র- প্রথম আলো (পৃ. ২, ক. ১) ইনকিলাব (শেষ.পৃ, ক. ১), ডেইলি সান (শেষ.পৃ, ক. ৮), ডেইলি স্টার (শেষ. পৃ, ক. ১)।

সম্পাদকীয়

- ক. সংবাদ, যুগান্তর, ইনকিলাব, ভোরের কাগজ, অবজারভার, ডেইলি সান, ডেইলি স্টার : অপারেশন টোয়াইলাইটে সিলেটে জঙ্গিবিরোধী অভিযানে নিহত ও আহতের ঘটনায় উদ্বেগ প্রকাশ করে এসব হামলার পেছনের অপশক্তির মূল্যোৎপাটনের জন্য রাজনৈতিক দলগুলোকে ঐক্যবদ্ধ হওয়ার আহ্বান।
- খ. ইন্ডেক্সাক : কর্মক্ষেত্রে কলকারখানার শ্রমিকদের নিরাপত্তা বিধানে জরুরিভিত্তিতে কারখানার মালিক, শ্রমিক ও সরকারের সমন্বয়ে ত্রিপক্ষীয় উদ্যোগ নেওয়ার ওপর গুরুত্বারোপ।
- গ. জনকর্ষ : ব্যবসায়ীদের কারসাজিতে নিত্য ভোগ্যপণ্যের বাজারে পণ্যসামগ্রির মূল্য বেড়ে যাওয়ায় বাজার মনিটরিং ও দ্রব্যমূল্য নিয়ন্ত্রণে বাণিজ্য মন্ত্রণালয়কে কঠোর মনোভাব নিয়ে অগ্রসর হওয়ার আহ্বান।
- ঘ. প্রথম আলো : রাজধানীর পশ্চিম কাজীপাড়ায় ঢাকা ওয়াসার পানিতে ময়লা ও দুর্গন্ধ থাকার পরিপ্রেক্ষিতে সুপেয় পানির সরবরাহ নিশ্চিত করতে ওয়াসাকে জরুরিভিত্তিতে কার্যকর পদক্ষেপ গ্রহণের সুপারিশ।
- ঙ. সমকাল : রেমিট্যান্স প্রবাহে বিঘ্নসৃষ্টিকারী হুন্ডিচক্রকে দমন করতে কেন্দ্রীয় ব্যাংক ও অর্থ মন্ত্রণালয়কে মনোযোগী হওয়ার প্রত্যাশা ব্যক্ত।
- চ. যুগান্তর : একাত্তরের মুক্তিযুদ্ধে ৩০ লাখ শহিদদের স্মৃতি বিশ্ববাসীর সামনে বিশেষভাবে তুলে ধরতে ত্রিশ লাখ বৃক্ষরোপণ কর্মসূচি ইতিহাস ও পরিবেশ রক্ষায় এক অনন্য উদ্যোগ বলে অভিমত প্রকাশ।
- ছ. ইন্ডিপেন্ডেন্ট : দেশে যক্ষ্মা নির্মূলে যক্ষ্মা রোগীদের ফ্রি-চিকিৎসার আওতায় আনতে সরকারকে ব্যাপক জনসচেতনতামূলক পদক্ষেপ নেওয়ার আহ্বান।
- জ. ডেইলি সান : বেকারি পণ্যসামগ্রীতে নন-ফুড গ্রেড কেমিক্যাল ব্যবহৃত হওয়ায় উদ্বেগ প্রকাশ করে খাদ্য নিরাপত্তার স্বার্থে জড়িতদের বিরুদ্ধে কঠোর আইনি পদক্ষেপ নেওয়ার সুপারিশ।
- ঝ. ডেইলি স্টার : মোবাইল অপারেটরদের সেবার মান যাচাইয়ে বিটিআরসি যে উদ্যোগ নিয়েছে, তাকে স্বাগত জানিয়ে এ উদ্যোগের সাফল্যের প্রত্যাশা করে সম্পাদকীয় প্রকাশ করেছে।

উপ-সম্পাদকীয়

সমকাল পত্রিকায় প্রকাশিত কলামে জঙ্গিবাদের মূলোৎপাটন করতে হলে যারা এখনও পর্দার আড়ালে থেকে জঙ্গিবাদ নিয়ন্ত্রণ করছে, তাদের চিহ্নিত করে আইনের আওতায় আনতে হবে বলে উল্লেখ করা হয়েছে।

নিবন্ধ ও ফিচার

সংবাদ পত্রিকায় প্রকাশিত ‘বনভূমি রক্ষা করে উন্নয়ন’ শিরোনামের নিবন্ধে মুসাহিদ উদ্দিন আহমদ অগ্রসরমান বাংলাদেশের প্রাকৃতিক ভারসাম্য রক্ষায় পরিবেশবান্ধব উন্নয়নের ধারাকে অব্যাহত রাখতে বৃক্ষ নিধন বন্ধ করতে হবে বলে অভিমত প্রকাশ করেছেন।

#